

Sier Zuan Pixani qu. sier Alvise procurator	439.888
† Sier Giacomo Soranzo qu. sier Francesco	967.364

Procuratori de Citra.

† Sier Andrea Justinian qu. sier Unfrè	700.633
Sier Antonio di Prioli qu. sier Marco	686.618
Sier Hironimo Zen qu. sier Piero	488.842
Sier Gasparo da Molin di sier Tomà	240.1089
† Sier Luca Trun qu. sier Antonio	1144.197
Sier Antonio Mocenigo di sier Alvixe el cavalier	554.783
Sier Francesco Mocenigo qu. sier Piero	291.1048
Sier Andrea Gusoni fo di la Zonta dil Conseio di X, qu. sier Nicolò	621.729
Sier Lorenzo Justinian qu. sier Antonio	474.857
Sier Marco de Molin qu. sier Alvixe procurator	449.872
† Sier Vincenzo Grimani di sier Francesco	964.386

Procuratori di Ultra.

† Sier Piero Marzello qu. sier Alvixe	781.536
† Sier Carlo Morexini qu. sier Batista	876.394
† Sier Lorenzo Pasqualigo fo di la Zonta dil Conseio di X, qu. sier Filippo	786.512

Fu poi balotate le voxe e fato un dil Conseio di X in luogo di un intrado Savio dil Conseio, et rimase sier Nicolò Trivixan fo consier, qu. sier Gabriel, et altre 8 voxe tutte per 4 man fo balotate.

A dì 5. Noto. In questa matina vidi un bellissimo arazo fato a oro di una battaglia, è assà homeni, fo dil re di Navara comprado a Brandizo per sier Andrea Falier nel suo ritorno; prima di Antivari da alcuni lo prese sotto Pavia e lo portò in Puia, e li costò ducati 350 tra danari et robe, e si dice ha potuto haver ducati 1200, ma vol assà più. È cosa bellissima e di gran precio, ma io voria più presto li danari che il razo.

Di Franza, fo letere di l' orator nostro, di Ambosa, replicate. Il sumario scriverò qui avanti di una sola.

Fo balotà cassier di Collegio, rimase sier Marco Antonio Grimani, et terminà per la Signoria sier

Francesco Contarini non sia balotado, qual si conza con sier Fulcio Contarini camerlengo di Comun.

Da poi disnar, fo Pregadi, et leto molte letere per Nicolò di Cabrieli et Hironimo Alberti secretari.

Fu poi posto per li Consieri, che quelli sono sopra le taxe et sopra l' imprestado di Gran Conseio possi venir in Pregadi fin San Michiel non metando balota. Ave: 101, 10, 3.

Et nota. Non fo nominà quali dee cazar li parenti come vol le leze.

Fo leto una letera di sier Zuan Marin podestà et capitano di Mestre, scrive zerea il fabricar de la doana ha zà scosso da li mercadanti di panno zerea ducati 200 et ne haverà di altri, con obligo de soldi 2 per peza, voria aiuto di la Signoria dil datio de la muda di Treviso di ducati 200 *ut in litteris*; et fo posto per li Savi che 'l dito podestà et capitano di Mestre debi far fabricar la doana, *videlicet* ducati 250 toi a imprestado da li mercadanti, et la restitution sia de soldo uno per peza di panni bassi, et soldi 2 di panni alti. *Item*, el dito podestà possi trazer de qui legnami per ducati 60 senza datio, da esser pagati di soldi si scoderà per peza *ut in parte*. Ave: 140, 4, 10.

Di Candia, di sier Domenego Capelo duca, 4 sier Hironimo Zane capitano et consieri, date a dì 15 Avosto, et ricevute a dì primo Octubrio. A li 4 scrivessimo li danni fati per le fuste turchesche su questa ixola da le bande di la Fraschia, da po dite fuste preseno sopra questa ixola di la banda di ostro una nave carga di vini per Messina de raxon de uno nominato Sentio di Baldissera, sopra la qual era il dito Sentio et la mandarono in Barbaria, sicome per relation di uno schiavo scampato di esse fuste si ha inteso, restando però dite fuste ne l' insula facendo molti danni et incursion. Heri havessimo letere dal retor di Soria, come a la volta di Cao Salomon, in uno loco dito Paleo Castro, do fuste turchesche hanno preso una naveta sorta sopra la qual era uno nostro venitian nominato Zuan de Andrea di Filadi, et manda la copia di dita letera. Scrive si mandi qualche galia de li, et che hanno scritto al clarissimo zeneral avisandoli el tuto, aziò li mandi qualche celere sufragio.

Di la Serchia, di sier Marin Pixani retor, di 12 Avosto, a hore 10, al rezimento di Candia. Magnifici etc. In questa matina, a hore 2 de zorno, vene la vardia deputata al Paleo Castro dando aviso *qualiter* do fuste turchesche haveano assaltado una naveta sorta la qual se ritrovava esser